



Жас Түркістан

қараша-желтоқсан №6/2002

Ақын
Жұмаш КЕНЕБАЙ



ҚАЙРАТ ТАНЫТҚАН ҚАЙРАТКЕРЛЕР

Мәкен УАҚ

ИМАНҒАЛИ ТАСМАҒАМБЕТОВ

Желтоқсан көтерілісінің бас құрбаны — Қайрат Рысқұлбековке туған ауылы Бірлікте ескерткіш орнатуға қор төрағасы қызметінде белсене араластым. Ескерткішті Алматыдағы театр-өнер институтының сол кездегі проректорлары Байгүрсын Өмірбеков пен Болат Досжановқа жасаттыратын болып келістік. Сонымен бірге ашылу салтанатына келетін қонақтарға шақыру қағаздарына да тапсырыстар бердік. Қайрат атындағы қор Басқармасының мүшелері кеңінен ақылдаса келе жас боздақтың рухын қастерлеуге атсалысқан он шақты азаматқа қымбат металдардан, барлығы 2 мыңдай төс белгілер жасаттыруды мақұл көрдік.

1992-жылы көктемде Алматыға барған сапарымызда осы мақсатпен Сувенирлер фабрикасының табалдырығын аттадық. Тапсырыс қабылдайтын жігіт орыстынан екен, қандай жұмыспен келгенімізді білген соң, Қайрат кім? — деп, сұрады. Жанымдағы жол серігім Асылхан Шүніреков

Жалғасы. Басы өткен санда.

байқамай, ол желтоқсан көтерілісіне қатысқан, дей бергенде-ақ, онда болмайды, Министрлер Кабинетінен рұқсат керек деп бас тартты. Тауымыз шағылып, амалсыздан Мұхтар Шахановқа бардық. Ол кісі ренжи отыра, олар менің атымды естісе, одан сайын қитығады. Мына қағазды алып, Жастар Ісі жөніндегі мемлекеттік комитеттің төрағасы Иманғалиға барсаңдар, төс белгілер істегуге көмектеседі деді...

И.Тасмағамбетов: — О, Мұханның мына хатын Мұражайға қоюға таптырмайтын құжат екен, деп, қалжындай, Өтеген Келібаев деген жігітті шақырып, бізге көмектес деп, табыстады. Өтеген Александр Садуақасов атты суретшіні таныстырды. Ол бізге төс белгінің жобасын келісілген ақы бойынша жасап беретін болды. Ал, төс белгілерді жасатуға Михаил Сачков, Николай Молчаненко деген жігіттермен таныстырды. Бірақ, оларға дер кезінде сұраған ақшаларын аударып бергенімізбен, екеуі ананымынаны сылтауратып, жұмыстарын бастай қоймады. А.Садуақасов болса, Жастар комитетінің басшыларына айтыңыз солар жоғарыдан звондап тұрмаса, бұлар уақыт соза береді деп,

ақылын білдірді. Өтеген Келібаевтарға барсам, бір күні Сырым батырдың тойы, енді бірде Ағыбай батырдың тойы болатын еді, деп, шапқылап жүргендері. Өтеген мен Иманғалиларға Сырым мен Ағыбай батырлардың тойларын халық ұйымдастырып жатқан жоқ па!? Сендер жастар ісімен шұғылданбайсыңдар ма?! Сачков пен Молчаненколарың төс белгілерін жасамай жатыр, тигізген көмектерің сол болсын, оларға ара-тұра қонырау шалып тұрындаршы десем, жарайды деп, мені шығарып салады. 400 шақырымдағы Мойынқұмнан әуре болып тағы келсем, “баяғы жартас — сол жартас” қозғалыс жоқ. Әйтеуір өрен дегенде Ескерткіш ашылу салтанатына арнап 500-ге жуық төс белгілерді жасаттырып, қалғандарын кейін алдық. Оның өзінде 300 дейін дұрыс жасамағандықтан қабылдадым... Осы төс белгілерді Қайраттың кітаптарымен қоса, Тәуелсіздік күндері Қ.Рысқұлбековтың рухын қастерлеуге арналған спорттық жарыстар мен жиындарда озық өнер көрсеткен жастарға тарту етіп келеміз.

Иманғали Тасмағамбетов екі жылдай Президентіміздің көмекшісі қызметін атқарғаннан кейін, Премьер-министрдің орынбасары қызметіне көтерілді. Сол кездерде оның қабылдауына кіргім келіп еді, бірақ жолым болмады. Иманғали Нұрғалиұлы Атырау облысы әкімдігінен қайтадан Премьер Министрдің орынбасарлығы

ғына қызметке келгенде, Елбасымыз оған Тәуелсіздікке 10 жыл толуына орай өткізілетін іс-шараларға басшылық жасауды міндеттеді. Осыған орай И.Н.Тасмағамбетовке 2001-жылдың 4-сәуірінде төмендегі хатты жолдадық:

**Құрметті Иманғали
Нұрғалиұлы!**

1991-жылы 22-наурызда Жамбыл облысы, Мойынқұм ауданында құрылған Қайрат Рысқұлбеков атындағы қор жастарымызды ұлтжанды-адамгершілікке тәрбиелеу жолдарында көптеген игі шаралар атқара алды.

1. Бірлік ауылындағы өзі оқыған мектепке Қайраттың есімін бергізді.

2. Туған ауылы мен Алматыдағы көшелерге Қ.Рысқұлбековтың атын бергізуге ат салысты.

3. 1992-жылы 10-қыркүйекте кіндік қаны тамған Бірлік ауылында ескерткіш бой көтерді.

4. 1993-жылы маусымда мектебінің алдына Белгі тас орнатқызды.

5. Айрықша ұлтжанды да өнегелі қасиеттерімен көзге түскен қазақ жастарына Қайрат атындағы сыйлық тағайындап, оның алғашқы жүлдесін, Омбы қаласындағы Қазақтың “Мөлдір” Мәдени Орталығының төрайымы Алтынай Жүнісоваға тапсырдық.

6. Алматыдағы Сәулет-Құрылыс Академиясында, Мойынқұм ауданындағы

Қ.Рысқұлбеков атындағы мектепте, Шу ауданының орталығы Төле би ауылында, 8 жыл оқыған С.Шәкіров атындағы мектепте Халық қаһарманы Қ.Рысқұлбековке арнап Мұражай бөлмелерін ашқыздық.

7. Семей, Алматы, Тараз қалалары мен Шу, Мойынқұм аудандарында өтізіліп келген ақындар айтысы мен спорт жарыстарына шамашарқымызша Қайрат атындағы жүлделерді тапсырып келдік.

8. Қ.Рысқұлбеков туралы “Ер намысы – ел намысы” мен “Қайрат және Желтоқсан көтерілісі” кітаптарын шығарып, халыққа тарату дамыз...

Аталып өткен игі шаралардың барлығы халықтың қолдауымен, дархан жанды мырзалардың көмектерінің арқасында атқарылды. Ашығын айтсақ, Үкімет орындарынан да, жас боздақтың өліміне кінәлі лауазымды басшылардың тарапынан ешқандай қолдау да, көмек те болмады.

Елбасымыз үстіміздегі жылға – Тәуелсіздікке 10 жыл – мәртебесін берді. Ата-бабаларымыз ғасырлар бойы аңсап келген тәуелсіздігімізге жол ашқан қасиетті бұлақ бастауы – Желтоқсан көтерілісі. Ал, Халық қаһарманы Қайрат Рысқұлбековтың алатын өзіндік орны ерекше емес пе!?

Сондықтан да үкімет тарапынан:

1. Алматыдағы Сәулет-Құрылыс Академиясына Қ.Рысқұлбековтың есімін

бергізуге (Бұл туралы “Алматы ақшамында” 10. 03. 2000. Қазақстан-1 “Отандастарда” 22. 05. 2000. Хабар-2. 13. 01. 2001. айттық).

2. Алматыда Желтоқсан құрбандарына Мұражай ашуға (1996-жылы қарашада телефон желісімен Президентіміз Н.Назарбаевқа айттым).

3. Қ.Рысқұлбеков 8 жыл оқыған Төле би ауылында (Шу ауданы, Жамбыл облысы) және Алматыға Ескерткіш орнатуға.

4. Астана қаласының жаңа көшелерінің біріне Қайрат Рысқұлбековтың есімін бергізуге.

5. Отансүйгіш қасиеттерімен дараланған Қарулы Күштер қатарындағы жауынгерлер мен жастарға арнап Қ.Рысқұлбеков атындағы марапат белгілері: Ордендер мен медальдар тағайындауға – Парасатты – кемеңгерлікпен ат салыссаңыздар нұр үстіне нұр болар еді.

Сондай-ақ, тәуелсіздігіміздің 10 жылдық мерекесіне тарту ретінде әрі болашақ ұрпақтарымызды иманды-ұлтжандылыққа тәрбиелеу мақсаттарында айтарлықтай ұлағатты істер тындырар едіңіздер.

Ізгі ниетпен,

Халық қаһарманы Қайрат Рысқұлбеков атындағы қор

Басқармасының төрағасы: Мәкен Уақтегі

хатшысы: Кенжебек

Ыбырайымов

Осы хатқа 2001-жылы 2-қазанда мынандай жауап келді: № 24-416319

Құрметті Мәкен Уақтегі! Сіздің Алматыдағы Сәулет-құрылыс Академиясына Қ.Рысқұлбековтың есімін беру туралы ұсынысыңыз осы оқу орны ректоратының кеңейтілген мәжілісінде қаралып, нәтижесінде ректорат мүшелерінің пікірі екіге бөлінгендіктен (жиналғандырдың жартысы Т.Бәсеновтың есімін беру жөніндегі ұсынысты қолдаған) жеткілікті дауыс жинай алмағанын хабарлаймыз.

Осыған орай, Халық қарманы Қ.Рысқұлбековтың атын Қазақ Сәулет-Құрылыс Академиясына беру мәселесін шешудің өзінше мүмкіндігі болмай тұр. Ал, қала көшелеріне кісі атын беру немесе қайта атау мәселелері заң бойынша қалалық әкімшілік пен мәслихаттардың өз құзырына берілген. Сіздің ұсынысыз біздің тарапымыздан Астана және Алматы қалалық әкімшіліктеріне жіберіліп, қалалық ономастика комиссияларының қарауына түсті.

Құрметпен, қолы

Р.Жоламан

Бұған да шүкіршілік ете, үлкен үмітпен жақсы хабар күтеміз... Президенттің төңірегіндегі лауазымды басшылардың арасында И.Тасмағамбетовтың беделі жоғарылау. Қырықтың қырқасына шыққан Иманғалидің мамандығы мұғалім болғандығына қарамастан көптеген жауапты қызметтерде болып, айтарлықтай тәжірибе жинақтап, пісіп жетілді деп, ойлаймын. Менімше, Н.Назарбаев И.Тасмағамбетовты

үлкен қызметке — Премьер-Министрдің жұмсақ орындығына отырғызғысы келіп жүрген сыңайлы. Кейбір саясаткерлер: Нұрсұлтан Әбішұлы Ельциннің жолын қуып, Иманғалиды Владимир Путин сияқты өз тағына жайғастыруға дайындалуда — деген пікірлерін білдіруде. Нүрекең де осал саясаткер емес, өте көреген. Соңғы кездегі Үкімет басындағы дағдарысқа орай, Демократиялық таңдау қозғалыстары құрылып, тағы да шайқала бастаған сияқты. Сондықтан да Елбасымыз күйеу балаларына да, И.Тасмағамбетовке де сенбей жақын інісі Қайрат Сатыбалдыны (ол Назарбаев фамилиясын өзгертті ғой) саяси сахнаға шығарды. Ол да бірте-бірте халық арасында бедел жинап келеді. Менің болжауымша, басқа-басқа емес, дәл Қайрат Сатыбалды Путиннің жолымен Нүрекеңнің ізбасары болуы ғажап емес.

Ата Заңымызды өз мүддесіне бағыттай бұрмалатқан Н.Назарбаев бүгінде елдің тізгінін ұстауға шамасы келіңкіремей, ие бола алмау хауіпі туындауда, сондықтан да өзінің ең жақын адамын Президенттік таққа отырғызып барып, халықты екеулеп басқаруды ойластыру үстінде. Осындай өзгерістердің 2002-жылы орындалуы әбден мүмкін.

ӘРКЕН УАҚОВ

Әйгілі Желтоқсан көтерілісіне қатынасып, құрбан болған, жапа шегіп жаза-

ланған ұл-қыздарымыз бен ер-азаматтарымыздың тізімдері жариялана бастаған соңақ, Әркен Уақовтың есімі көзіме оттай басылған болатын. Өйткені, менің есімім Мәкен, фамилиям Уақов. Әрекең бұған қосымша Қайрат оқыған Сәулет-Құрылыс академиясының доценті қызметінде еңбек еткен. Кездескен таныстарымның көпшілігі: — Әркен Уақов туысың емес-пе? — деген сауалдарын қойып та жүрді. Бірде Алматыдағы Ұлттық-Жаңғыру Орталығының төрағасы Дәурен Сатыбалды: — сен осы Әркен Уақов емессің бе? деп, сұрады. Мен болсам, жоқ, ол кісі менімен фамилиялас деп жауап қайтардым. Дәукең сонда: — Егер сол кісінің өзі болғанында сені Президенттікке үміткер ретінде сайлауға ұсынуға күш салатын едім, дегенде, ол кісінің ақ көңілдігіне күлдім де қойдым.

1993-жылдың желтоқсанында Қарағанды, Теміртау қалаларының жоғарғы, орта оқу орындары жастарымен кездесуге жолсапарымен барғанмын. Қайтар кезеңде Қарағандының теміржол бекетінде Прибалтикалық егделеу азаматпен кездейсоқ танысып қалдым. Аты-жөнімді айтқан соң, ол да Әркен Уақовтың туысы емессің бе, деп, сұрады. — Жоқ, Әрекеңді танысыз ба? — деп, өзіне сауал тастағанымда, Ә.Уақовтың Жәйрем қаласында жазасын өтеп, әрі қызмет етіп жүргендігін айтқан еді...

1996-жылдың ақпанында Ағыбай батыр қорының директоры Сейіткерім Қожа-

назар, Төле би қорының басшысы Оралжан Масатбаевпен ақылдаса келе 13-наурызда Қайраттың 30 жасқа толу құрметіне өзі оқыған Алматыдағы Сәулет-Құрылыс Академиясында жастармен жиын өткізгіміз келіп, ақылдасқан едік. Осы мақсатпен Академияның сол кездегі проректоры Жанкелді Отарбаевқа жолығып едім, менің аты-жөніммен танысқан соң: – сіз ректор Атрушкевичке кірмей-ақ қойыңыз, өйткені осы Академияда Уақов Әркен деген доцент Желтоқсан көтерілісін ұйымдастырушылардың бірі ретінде сотталған. Сізді сол кісінің жақыны деп, қырсығып, ректор мүлдем рұқсат бермей қоюы мүмкіндігін ескертті.

Оралжан Масатбаев пен Сейіткерім Қожаназар қатынас қағаздарымен Атрушкевичтің қабылдауында болып, жиын өткізуге рұқсат алып шықты. Жанкелді Отарбаев пен кітапханашы қыздар үш әріп тыңшыларының араласқанына қарамастан Қайраттың 30-ға толған күніне орай еске алу жиынын ойдағыдай өткізуге жанын салды. Көптеген баспасөз құралдары өкілдерімен қатар “Азаттық” Радиосының тілшісі Батырхан Дәрімбет те қатысты.

Кейінірек “Егемен Қазақстан” газетінен Әркен Уақовтың заң жүзінде ақталып шыққанын оқып қуанып қалдым. Атрушкевич сенатор болып кеткен соң, Академияға А.Құсайынов ректорлыққа тағайындалғаннан кейін, аз да болса сең қозғалып, Қайрат Рысқұлбековтың

туған күніне байласты 2000-жылы 13-наурызда Академия ұжымы жиын ұйымдастырды. Қайрат қорының атынан Сейіткерім Қожаназар екеуіміз қатынасып, осы оқу орнына Халық қаһарманының есімін бергізу, алдымен Ескерткіш орнату, Мұражай ашу жайлы пікірлер қозғалды. Ең қуаныштысы, ұлағатты кешке Желтоқсан батырлары: Жансая Сәбитова, Қайырқелді Күзембаев, Құтыбек Аймаханов, Жамбыл Тайжұмановтармен бірге Әркен Уақов ағамыз да келіпті...

Әрекен сөз алып: – Желтоқсан көтерілісінен соң өзіммен бірге қызмет ететін әріптестерім мені ұйымдастырушылардың бірі ретінде көрсеткен болулары керек. Олар осында әлі қызмет етіп жүр. Мені де қамауға алып, істерім тергеуге түсті. Бірде тергеушілер мені Қайратпен беттестіріп: – Сендерге алаңға барыңдар деп үгіттеген мынау мұғалімді танысың ба? деген сұрақ қойды. Сонда Қайрат: Мен бұл кісіні танымаймын Алаңға өзіміз бардық, бізді ешкім үгіттеген жоқ, деді. Егер сонда Қайрат жалтақтық танытып, басқаша айтқанда, мен де ату жазасын алған болар ма едім, – деп, көзіне жас алды... Жиын соңында Әркен аға бізбен жете танысқысы келіп, Қайраттың өлімі жайлы деректерден хабардарлығын айта, амандық болса, Желтоқсан көтерілісі жайлы кітап жазбақ ойы бар екендігін білдірді.

Ара-тұра “Азаттық” радиосы мен “Солдат” газетінен ашық та, батыл мәлім-

деме жасап, үлкен бетбұрысқа бағыт алды. Көп ұзамай, орыс тілінде “Желтоқсан көтерілісіндегі геноцидте Н.Назарбаевтың кінәлілігі туралы деректер” деген кітабы жарыққа шықты. Өкінішке орай, сол кітаптарының көпшілігі “үш әріп жандайшаптарының” көмегімен тәркіленіп, оқырмандарға кеңінен таралмай қалды. Осы кітаптар жарық көрген соң, 2001-жылы ақпанның соңына таман “Азаттық” радиосынан Қайраттың өлімі туралы хабарлама жасадым.

Біршама уақыт жоғарыдан қысымдар жасалынып, Әрекен әжептеуір науқастанып та қалды деп, естідім. Он шақты жылға жазықсыздан-жазықсызға сотталу, кейіннен лауазым иелері тарапынан Жәйрем қаласындағы жосықсыздықтар, бірнеше жыл әуре-сарсаңға түсе өзін-өзі заң жүзінде толықтай ақтап шығу, әрине, 70-тен асқан қарияға оңай шаруа емес!! Бұндай қиыншылықтарға жігіттердің-жігіттері, олардың ішінде нар, сұлтандары ғана шыдайтыны баршамызға белгілі.

Ашығын айтқанымда, он жылдан астам уақытта Желтоқсан көтерілісіне қатынасушы көптеген қайраткерлер бой көтерді. Көпшілігі ананы-мынаны айтып, әрдайым науқанды ұрандар көтерумен келеді. Бірақ нәтиже шамалы. Желтоқсан комитетінің жігіттері жік-жікке бөлініп, ырың-жырыңмен бастары қосылмауда. Көбі пәтерлер, қаржылай көмек алған соң біраз жылдар бойы көрінбей кетеді.

Кейбіреуі тіптен, “дайын асқа” – Қайрат Рысқұлбеков атындағы қордың тізгініне ие болғысы келіп те жүр. Мен оларға: – Құдайға шүкір, Қайратқа байланысты игі шаралар атқарылды. Бүгінде бүкіл халық болып қолдауда. Желтоқсан құрбандары: – Ләззат Асанова, Ербол Сыпатаев, Сәбира Мұхаметжановалардың рухын құрметтеуге ат салысындар, олар көбіне ұмыт қалуда, деп ескерттім де.

Ал, Әркен ағамыз мен деген талай қайраткерлер айта алмай келген ащы шындықты айтып, Желтоқсан көтерілісінің көлеңкелі бетіне жарық түсіріп, болашақ ұрпақтарымызға айтарлықтай сый тарту ете, тарихымыздың бұрмаланған беттеріне түзету енгізуге күш салып отырған жоқ па!?!

ТЕМІРТАС ТІЛЕУЛЕСОВ

1995- жылы 16-маусымда “Караван” газетінде жарық көрген “Шымкентские тайны” атты мақаланы оқып, Т.Тілеулесовке сырттай қызығып, соңы немен тынады екен деп, елендеп жүрдім. Ол кездерде Мойынқұм ауданында тұратынмын. Жоғарыдағы мақала жарық көрген “Караван” газетін көптеген таныстарыма оқытып, пікір таластырдық та. Ара-тұра Теміртас туралы “Азаттық” радиосы да хабарлар беріп тұрды. Кейінірек жемсаулары кең, арандары ашылған лауазымды

жемқорлармен күресіп, шындыққа жете алмай, әбден ашынған Т.Тілеулесов кітап жазып жатқанын да естідім.

1999-жылдың басында Алматыға барып қалған сапарымда Батырхан Дөрімбетке жолығып едім, маған “Ордалы жылан” кітабының екі данасын берді. Ол кітаптың бірін Шу аудандық кітапханасына тарту еттім. Содан бастап “Ордалы жылан” қолдан-қолға тимей, көпшіліктің сүйікті кітабына айналды. Өзім Теміртаспен бетпе-бет кездескен емеспін. Тек бірекі мәрте телефонмен хабарласқаным болмаса...

“Ордалы жылан” кітабына байланысты әшкереленген лауазымды басшылар Теміртастың соңына шырақ алып түсті. Сотқа да берді, бірақ, ешнәрсе бітіре алмаған олар оннан астам бас бұзар бұзақыларды жалдап, Теміртасты соққыға жығып, ауыр халде ауруханаға жатқызды. Кейін Т.Тілеулесовке тиіскен бұзақылардың бірекеуі, ол бізді ұрып жарақаттады деп, Теміртастың өзін сотқа беріп, іс қозғады. Осындай жосықсыздыққа орай, “Қапы қалмайық ағайын” айдарымен 2000-жылы 1-маусымда кешкісін, ертеңіне 2-маусымда “Азаттық” радиосынан:

– Жақында “Азаттық” радиосынан “Ордалы жылан” кітабының авторы Теміртас Тілеулесовтың қамауға алынып, кепілдікке босатылғанын естіп, зығырданып қайнады. Алдында ғана өлімші болып, соққыға жығылып ауруханаға да жатып

шыққан жоқ па – еді?!.. Бұл не деген сұмдық!!! Кезінде ақиқатты шындықтан қорыққан көсемдер 1986-жылы Желтоқсан көтерілісінің қаһарманы – Қайрат Рысқұлбековтың өміріне қаспандық жасатқан еді. Енді міне, сол Желтоқсан боздақтарының қандарының арқасында қолдары жеткен Тәуелсіздігіміздің бал-қаймағы мен жал-жаясына семіріп, көздерін шел басқан Айдаһарлар Ордасын әшкерелеген Теміртас бауырымыз небір зұлымдықтарды басынан кешіруде. Немқұрайды – енжарлығымыздың кесірінен Қайраттай боздақтардың өмірлеріне ара түсе алмадық.

Масқара боп, ұятқа қалмайық десек, ащы шындық үшін жападан жалғыз шырылдап жүрген Теміртасты халық болып қолдап, енді оны қорлауға жол бермей, демеу көрсетейік, ағайын!!!... дей, ашына айттым.

Ұмытпасам, 2000-жылдың күзіне таман, “сценарийлы сот” басталып, Теміртас Тілеулесов әділетсіз жазаның құрбандығынан алдын-ала сақтанып, бой тасалап үлгерді. Сөйтіп, қаншама уақыт өуре-сарсаңға түсіп, шындық іздеп шырылдаған Теміртастың тауы шағылып, оны сыртынан 2 жылға қатаң режимді жазамен соттаған сот үкімі де шығып, бас бұйдасын сыбайлас жемқорлар басқарып отырған “коррупциялық мемлекетке” айналғанымызға көзім әбден жетті...

2001-жылы қаңтардың соңында Жетісу аудандық сотына “Солдат” газетінің ре-

дакторы Ермұрат Бапи мен Көрішал Асан-Атаның үстінен қозғалған сот процесіне қатынасуға Сейіткерім Қожаназар екеуіміз барған болатынбыз. Сонда Қайролла Адамұлынан Теміртастың ағасы Мекемтастың мекенжайын анықтап алдым. Ел таныған Батырдың бауырына жолығу қиынға түспеді. Мекемтас мені жатсынбай қарсы алып, інісінің бірнеше жылдан бері басынан өткеріп жатқан қиыншылықтары туралы жанжақты әңгімелеп берді. Теміртасты жалғызсыратпай, әрдайым көмектесіп келе жатқанын, оны әділетсіз жазалаған сот шешімімен келіспейтінін, Астанадағы Жоғарғы орындардан үміт күтетінін білдірді.

Сондай-ақ, “Ордалы жылан” мен “Шымкентская мафия” кітаптарын шығаруға тікелей өзінің ат салысқанын айта келе, олардың түп нұсқалы жазбаларын да көрсетті. М.Тілеулесовтың мамандығы дәрігер-фармацевт. Қызметтес таныстарының, жора-жолдастарының көмектерінің шарапатымен кейінгі “Шымкентская мафия” кітабін 10 мың таралыммен, сапалы да жоғарғы деңгейде шығарылғанына шүкіршілік етіп, маған қол таңбамен бір кітапты Теміртас екеуінің атынан тарту етті...

— Асанбай Асқаровқа жолықтыңыздар ма? — деген сауалыма: — Асекең Қалқамандағы ауруханада емделіп жатқан екен. Мен көңілін сұрап барып, мән-жайды түсіндірдім. Ол кісі қазірше

ешнәрсе айта алмайтынын ескерте келе, өзінің шет елдік бір қымбат дәріге зәру екендігін білдірді. Таныстарымның көмегімен өте қымбаттығына қарамай сатып алып, дәрілерді апарғанымда, қуанып, ризашылығын білдірді. Сауығып шыққан соң Асекеңнің от басында болдым... деп, ашығын айтты.

Сонымен бірге, Мекемтас әділетсіз сот шешімінің күшін жойдыруға Жоғарғы сотқа шағымданып жүргендерін, егер мақсаттары орындалатын болса, Теміртастың жасырынбай, жарыққа шығатынын сездірді. Мекемтасқа сәттілік тілеп, жылы қоштастым.

Кейінірек “Азаттық” радиосынан Теміртастың бірекі мәрте сөйлегенін естідім. Жоғарғы сот оңды шешім қабылдамай, уақытты созып жүргенін естідік. Жақын арада Мекемтас телефон арқылы маған хабарласып, Теміртастың ісінің Желтоқсан көтерілісін ұйымдастырушылардың бірі ретінде сотталған Әркен Уақовтың мемлекеттік айыптаушысы болған И.Лепихин дегенге түскенін ренжи отыра айтып берді. Тек, шыншыл, тәуелсіз заңгер Нури Муфтахтың көмектесуге кіріскенін тілге тиек етіп, шүкіршілік қылды...

Жалпы алғанда, жүйкесі де өзі де темірден жаралған Теміртас Тілеулесовтың басынан өткерген құқайлары бір емес бірнеше том кітапқа арқау болып қана қоймай, деректі коррупция кинофильмдерге де таптырмас

тақырып екендігі де айдан анық. Осындай жүгенсіз сорақылықтарға қарағанда, қарапайым қалың жұртшылық емес, Елбасымыз өзі бас болып ауыздары арандай ашылған лауазымды мырзалар тәуелсіздікті иеленіп, он жылдан бері халқымыздың қанын қандаладай сорып келе жатқаны ащы шындық. Алдымен Н.Назарбаевтың ауызға оралатын себебі, оның ары да жаны да таза болғанда, Т.Тілеулесовтың басын сергелдеңге салып, оны жемқор жалмауыздардың ортасына талауға тастап, жападан жалғыз шырылдатып қоймас еді.

Президентіміз “мың өліп мың тірілген” халқымыздың жарқын болашағына жаны шындап ауырғанда, Теміртасты жанына алып, сыбайлас жемқорлармен күресетін комитетті басқартып қолдау көрсеткен болар еді ғой. Амал нешік, еліміз құдайдай сенген Елбасымыз өкінішке орай, Т.Тілеулесовтей адал да, ақ жүрек азаматтарға қорған болудың орнына халықты қандаладай сорған қараниетті қорқаулардың қол шоқпарына айналып бара жатқанына, қалың көпшіліктің ғана емес тіптен, әлем жұртшылығы да хабардар бола бастағаны ащы шындық!!...